

I. DISPOSICIÓN XERAIS

MINISTERIO DE EDUCACIÓN, POLÍTICA SOCIAL E DEPORTE

1600 *Real decreto 74/2009, do 30 de xaneiro, polo que se determina o nivel mínimo de protección garantido aos beneficiarios do sistema para a autonomía e atención á dependencia para o exercicio 2009.*

A Lei 39/2006, do 14 de decembro, de promoción da autonomía persoal e atención ás persoas en situación de dependencia (en diante Lei 39/2006), establece no seu artigo 7 que a protección da situación de dependencia se prestará de acordo cos seguintes niveis de protección: un nivel mínimo de protección garantido pola Administración xeral do Estado, un nivel de protección acordado entre a Administración xeral do Estado e cada unha das comunidades autónomas e un nivel adicional que poden establecer, pola súa parte, as comunidades autónomas con cargo aos seus orzamentos.

O artigo 9 da Lei 39/2006 dispón que o Goberno, oído o Consello Territorial do Sistema para a Autonomía e Atención á Dependencia, determinará o nivel mínimo de protección garantido para cada un dos beneficiarios do sistema, segundo o grao e nivel da súa dependencia, como condición básica de garantía do dereito á promoción da autonomía persoal e atención á situación de dependencia. No seu número 2 establece que o financiamento público deste nivel de protección correrá por conta da Administración xeral do Estado.

En desenvolvemento do anterior aprobáronse o Real decreto 614/2007, do 11 de maio, sobre nivel mínimo de protección do sistema para a autonomía e atención á dependencia, garantido pola Administración xeral do Estado (en diante Real decreto 614/2007), e o Real decreto 6/2008, do 11 de xaneiro, polo que se determina o nivel mínimo de protección garantido aos beneficiarios do sistema para a autonomía e atención á dependencia no exercicio 2008.

O artigo 3.3 do mencionado real decreto establece que o nivel mínimo de protección para cada beneficiario do sistema será o equivalente á cantidade fixada para cada grao e nivel de dependencia que se determinará anualmente segundo o calendario de aplicación progresiva regulado na disposición derradeira primeira da lei. As ditas contías serán obxecto de actualización anual mediante real decreto, tendo en conta a actualización aplicada ao indicador público de rendas de efectos múltiples (IPREM).

Este real decreto ten por obxecto establecer as contías para o nivel mínimo de protección garantido pola Administración xeral do Estado para os beneficiarios valorados no grao II, dependencia severa, nivel 1, de acordo co previsto no artigo 9 da Lei 39/2006, para o exercicio 2009, terceiro ano da súa vixencia. Así mesmo, actualízanse, para o dito exercicio, as contías correspondentes ao grao III, gran dependencia, niveis 1 e 2 e grao II, dependencia severa, nivel 2, de acordo co preceptuado no artigo 3.4 do Real decreto 614/2007.

Este real decreto someteuse á consulta do Comité Consultivo do Sistema para a Autonomía e Atención á Dependencia, do Consello Estatal de Persoas Maiores, do Consello Nacional da Discapacidade e do Consello Estatal de Organizacións non Governamentais de Acción Social, e recibíuse informe do Consello Territorial do Sistema para a Autonomía e Atención á Dependencia.

Este real decreto dítase ao abeiro do disposto no artigo 149.1.1.^a da Constitución, que lle atribúe ao Estado a competencia exclusiva na regulación das condicións básicas que garantan a igualdade de todos os españois no exercicio dos dereitos e no cumprimento dos deberes constitucionais.

Esta norma establécese ao abeiro da facultade conferida ao Goberno na disposición derradeira sétima da Lei 39/2006 e no artigo 3, números 3 e 4 do Real decreto 614/2007.

Na súa virtude, por proposta da ministra de Educación, Política Social e Deporte, co informe do ministro de Economía e Facenda, de acordo co Consello de Estado, e logo de deliberación de Consello de Ministros na súa reunión do día 30 de xaneiro de 2009,

DISPOÑO:

Artigo único. *Achega da Administración xeral do Estado para o financiamento do nivel mínimo de protección para o exercicio 2009.*

1. A achega da Administración xeral do Estado para o financiamento do nivel mínimo de protección do sistema para a autonomía e atención á dependencia no exercicio 2009 queda establecida para cada beneficiario en situación grao II, dependencia severa, nivel 1, nas cantidades que constan no anexo a este real decreto.

2. Así mesmo, procédese á actualización das contías sinaladas para o nivel mínimo de protección garantido pola Administración xeral do Estado para cada beneficiario do sistema de grao III, gran dependencia, niveis 1 e 2 e grao II, dependencia severa, nivel 2, fixadas no anexo, de conformidade co incremento do 2 por 100 do indicador público de renda de efectos múltiples (IPREM), establecido na Lei 2/2008, do 23 de decembro, de orzamentos xerais do Estado para o ano 2009.

Disposición derogatoria única. *Derogación normativa.*

Quedan derogadas cantas disposicións de igual ou inferior rango se opoñan ao disposto neste real decreto.

Disposición derradeira primeira. *Título competencial.*

Este real decreto dítase ao abeiro do disposto no artigo 149.1.1ª. da Constitución, que lle atribúe ao Estado a competencia exclusiva sobre a regulación das condicións básicas que garantan a igualdade de todos os españois no exercicio dos dereitos e no cumprimento dos deberes constitucionais.

Disposición derradeira segunda. *Habilitación para o desenvolvemento regulamentario.*

Habílase o titular do Ministerio de Educación, Política Social e Deporte para ditar as disposicións que sexan necesarias para a aplicación e o desenvolvemento deste real decreto.

Disposición derradeira terceira. *Entrada en vigor e efectos.*

Este real decreto entrará en vigor o día da súa publicación no «Boletín Oficial del Estado», con efectos do día 1 de xaneiro de 2009.

Dado en Madrid o 30 de xaneiro de 2009.

JUAN CARLOS R.

A ministra de Educación, Política Social e Deporte,
MERCEDES CABRERA CALVO-SOTELO

ANEXO

Expresión cuantificada dos niveis de protección do sistema para a autonomía e atención á dependencia 2009

Grao e nivel	Mínimo de protección garantido – Euros ¹
Grao III gran dependencia nivel 2	263,93
Grao III gran dependencia nivel 1	179,47
Grao II dependencia severa nivel 2	102,00
Grao II dependencia severa nivel 1	70,00

¹ As cantidades asignadas para cada grao e nivel están incrementadas, respecto ao exercicio 2008, nun 2%, incremento previsto para o IPREM na disposición adicional vixésimo oitava do proxecto de orzamentos xerais do Estado para o exercicio 2009.